

आकाशवाणी जयपुर—अजमेर  
प्रादेशिक समाचार  
दिनांक 10.11.2024 समय: 18.45 बजे

- प्रदेश मांय सात विधानसभा सीटों माथे हो रिया उपचुनाव ने लेर चुनाव प्रचार तेज—मुख्यमंत्री भजन लाल शर्मा साथे भाजपा कांग्रेस रा प्रमुख नेतावां कर्यो चुनावी सभावां ने संबोधित।
- राज्य रा 7 खेतरां मांय होवण वाळा विधानसभा उपचुनाव ने लेर निर्वाचन महकमो सगळी तैयारियां करी पूरी—मतदान दिवस रे दिन 9 हजार सुरक्षाकर्मी रेवेला तैनात।
- प्रदेशभर मांय आज आंवला नवमी रो परब पारंपरिक सिरधाभाव सूं मनायो जा रियो है।
- राज्य री घणाखर ठोडां माथे रात रे तापमान मांय कमी आणे सूं सुंवारे अर सिंज्या गुलाबी ठण्ड रो होवण लाग्यो एहसास।

000

प्रदेश मांय विधानसभा उपचुनाव वाळा खेतरां मांय न्यारा राजनीतिक दळां रा नेता जोर शोर सूं पार्टी रा उम्मीदवार रे समर्थन मांय प्रचार कर रिया है। इणी कडी मांय आज भाजपा रा वरिष्ठ नेता अर मुख्यमंत्री भजनलाल शर्मा दौसा मांय भाजपा प्रत्याशी रा समर्थन मांय रोड शो करयो। बाद मांय गांधी तिराहे माथे जनसभा ने संबोधित करता व्हीया भाजपा के पक्ष में मतदान करने की अपील की। मुख्यमंत्री दोपहरां पाछे अलवर रे रामगढ खेतर मांय भी चुनावी सभा ने संबोधित करयो। वठी ने आज केंद्रीय मंत्री भूपेंद्र यादव रामगढ मांय, पार्टी रा पैली आळा प्रदेशाध्यक्ष सीपी जोशी झुंझुनूं शिक्षा मंत्री मदन दिलावर देवली उनियारा अर खेल राज्य मंत्री के के विश्नोई खींवसर विधानसभा खेतर मांय दौरे माथे रिया। वठी ने नेता प्रतिपक्ष टीकाराम जूली अर पैली आळा उपमुख्यमंत्री सचिन पायलट आज रामगढ मांय कांग्रेस प्रत्याशी रे समर्थन मांय जनसभा ने संबोधित करयो। इण रे पाछे पायलट अर पैली आळा मंत्री प्रताप सिंह खाचरियावास, ममता भूपेश दौसा मांय कांग्रेस प्रत्याशी रे समर्थन मांय चुनावी सभा ने संबोधित करयो।

000

प्रदेश रा 7 खेतरां मांय होवण वाळा विधानसभा उप चुनाव ने लेर निर्वाचन महकमो सगळी तैयारियां पूरी कर ली है। आं चुनावां मांय मतदान दिवस रे दिन सुरक्षा रा पुख्ता इंतजाम व्हेला। चुनाव ने लेर केन्द्रीय सुरक्षा बल, पुलिस, आरएसी अर होमगार्ड रा 9 हजार सू बत्ती सुरक्षाकर्मियां ने तैनात करयो जावेला। मुख्य निर्वाचन अहलकार नवीन महाजन बतायो कि मतदान दिवस 13 नवम्बर ने आं खेतरां मांय सघन जांच अर निगराणी रे खातिर हर विधानसभा खेतर मांय फ्लाइंग स्क्वॉड, एसएसटी दळ तैनात रेवेला। चुनाव खर्च रे लिहाज सूं संवेदनशील मतदान केंद्रां मांय बेसी निगराणी टीमां तैनात करीजी है। मतदान रे चालता 1 हजार 122 मतदान केंद्रां री लाइव वेबकार्सिंग करी जावेली। मुख्य निर्वाचन अहलकार बतायो कि 7 विधानसभा खेतरां रा सगळा 1 हजार 915 मतदान केंद्र कुल 1 हजार 366 लोकेशन माथे है, जिण मांय सूं 604 मतदान केंद्रां री लोकेशन ने संवेदनशील मान्यो ग्यो है। आं सगळी लोकेशन माथे केंद्रीय सुरक्षा बळ री तैनाती व्हेला। ध्यान जोग है कि प्रदेश रा रामगढ, दौसा, झुंझुनूं सलूम्बर, चौरासी, खींवसर अर देवली—उनियारा मांय 13 नवंबर ने मतदान व्हेला।

0000

प्रदेश रा 193 विधानसभा खेतरां मांय आज सगळा मतदान केन्द्रां माथे खास शिविर लगार मतदाता सूचियां मांय संशोधन खातिर आवेदन लिया गया। उपचुनाव वाळा सात विधानसभा खेतर ने छोडर बाकी सगळा खेतरा मांय खास संक्षिप्त पुनरीक्षण—एसएसआर—2025 रे तैत अ शिविर राख्या गया। इण रे चालता नुवां नाम जोडणे, हटाणे, पते अर फोटू मांय गळती सुधार खातिर दावा अर आपत्तियां खातिर आवेदन भी लिया गया। साथे ही मतदान केन्द्रां माथे नुवा मतदाता जका 18 बरस री उमर पूरी कर चुक्या है वाणो मतदाता सूची मांय आपरो नाम जुडवाणे खातिर ऑनलाईन अर ऑफलाईन प्रक्रिया री जाणकारी दी गई। आं शिविरां मांय मतदान खातिर जागरूकता बढाणे सारू मतदाता शपथ पठन, वोटर हेल्पलाइन एप अर निर्वाचन महकमा सूं जुडी दूजी एप्स री भी जाणकारी दी गई। प्रदेश रा सगळा 200 विधानसभा हलका खातर

आखिरी मतदाता सूचियां रो प्रकाशन आवता बरस 6 जनवरी ने करयो जावेला। इण बीचे, उपचुनाव वाला खेतरां मांय चाल री होम वोटिंग रे दूजे चरण रो आज आखिरी दिन है।

000

प्रधानमंत्री नरेन्द्र मोदी आज विशेष अभियान रे चौथे संस्करण री सराहना करी। विशेष अभियान सूं सरकारी खजाने ने बरस 2021 रे बाद सूं कचरो बेचणे सूं दो हजार 364 करोड़ रुपया रे राजस्व रे साथै खास उपलब्धियां मिळी है। श्री मोदी एक पोस्ट् मांय कयो कि अभियान री सफलता दर्शावे है कि साझां प्रयासां सूं ठोस नतीजा हासिल कर्या जा सके है अर स्वच्छता और आर्थिक लाभ ने घणो बधावो दियो जा सके है। वणा कयो के कुशल प्रबंधन अर सक्रिय जतन सूं चोखा नतीजा मिळ्या है।

000

भारत रा सात संस्थान वैशिक स्तर रा शीर्ष 100 संस्थानां मांय जगह हासिल करी है। क्यू.एस. वर्ल्ड यूनिवर्सिटी रेंकिंग : एशिया 2025 दुनिया रा शीर्ष 100 विश्वविद्यालयां री सूची जारी करी है। इण सूची मांय भारतीय प्रौद्योगिकी संस्थान—आई.आई.टी., दिल्ली 44वीं ठोड माथे है। आई.आई.टी., बॉम्बे 48वें नम्बर माथे है। सूची मांय आई.आई.टी मद्रास, आई.आई.टी. खड़गपुर, आई.आई.टी. कानपुर अर दिल्ली विश्वविद्यालय भी आपरी जगह बणाणे मांय सफल रिया है। यह रेंकिंग पूर्वी, दक्षिणी, दक्षिण—पूर्वी अर मध्य एशिया रे 25 देशां रा 984 संस्थानां रे प्रदर्शन रे आधार माथे तैयार करीजी है।

000

राष्ट्रीय मानवाधिकार आयोग काले सूं नई दिल्ली मांय विदेश मंत्रालय रे सहयोग सूं छह दिन रो भारतीय तकनीकी अर आर्थिक सहयोग कार्यकारी क्षमता निर्माण कार्यक्रम सरू करेला। ओ आयोजन सोलह नवम्बर ताई चालेला। इण कार्यक्रम मांय मालदीव, नेपाल, श्रीलंका अर थाइलैंड समेत आठ देशां रे राष्ट्रीय मानवाधिकार संस्थानां रा मोटा अहलकार अर दूजा जणा भाग लेवेला। आयोग रे मुजब इण कार्यक्रम रो लगस न्यारा—न्यारा खेतरां मांय मानवाधिकारां ने प्रोत्साहन, संरक्षण अर मजबूती देणो है।

000

प्रदेश मांय आज आंवला नवमी रो परब पारंपरिक सिरधाभाव सूं मनायो जा रियो है। इण मौके माथे राजधानी जयपुर, टोंक साथे न्यारा—न्यारा शहरां अर कस्बा मांय महिलावां आवंडे रे पेड़ री पूजा कर र घर पिरवार मांय खुशहाली री कामना करी अर दानपुण्य करयो।

वठी ने अजमेर जिला रा पुष्कर मांय चाल रिया मेळे मांय आज न्यारी न्यारी होडां राखीजी अर आंवला नवमी परब रे चालता महिलावां स्नान—दान करयो। और ब्यौरो म्हाणा खबरनवीस सूं—

.....

पोराणिक मान्यतावां रे मुजब कार्तिक म्हीणे री शुक्ल पक्ष री नवमी तिथि ने ओ परब मनायो जावे है। ऐडी मान्यता है के कार्तिक शुक्ल पक्ष री नवमी सूं लेर पूर्णिमा ताई भगवान विष्णु आंवंडे रे पेड़ मांय निवास करे है। इण मौके माथे जिको दान—पुण्य करयो जावे है, ऐडी मान्यता है कि बीको अक्षय पुण्य मिले है।

000

जयपुर रा गणगौरी बाजार थापित राजस्थान नेत्रहीन कल्याण संघ री कानी सूं ब्रेल पुस्तक विमोचन अर सम्मान जळसो राख्यो गयो। इण मौके माथे डॉ. रामावतार शर्मा कानी सूं लिख्योडी किताब 'प्रज्ञा नचन' रे ब्रेल संस्करण रो विमोचन करयो गयो। जळसा मांय संघ रा रिसोर्स रूम रो भी उद्घाटन करयो गयो। कार्यक्रम मांय अतिरिक्त महाधिवक्ता विज्ञान शाह अर संघ सूं जुड़या अहलकार, शिक्षक अर छात्र मौजूद रिया।

000

राजस्थान अध्यापक पात्रता परीक्षा—रीट खातिर आवेदन प्रक्रिया एक दिसम्बर सूं सरू व्हेला। राजस्थान माध्यमिक शिक्षा बोर्ड, अजमेर री कानी सूं राख्यी जावण वाली आ परीक्षा आगला बरस फरवरी म्हीना मांय व्हेला। परीक्षा सूं जुड़ी सगळी जाणकारी 25 नवम्बर ताई बोर्ड री आधिकारिक वेबसाइट माथे जारी करी जावेला। परीक्षा शुल्क पैळी वाळी परीक्षा रे जेडो ई रेहवेला।

0000

प्रदेश री घण्खर ठोड़ां माथे रात रे तापमान मांय कमी आणे सूं सुंवारे अर सिंज्या के बगत गुलाबी ठण्ड महसूस होवण लागी है। वठी ने दिन मांय अजे भी गर्मी रो असर बण्योडो है। राज्य मांय लारला 24 घंटां मांय सब सूं बत्ती 37 डिग्री सेल्सियस बत्ती ऊं बत्ती तापमान बाडमेर मांय दर्ज करीज्यो। मौसम केन्द्र जयपुर रे मुजब लगेटगे सगळी जगावां माथे तापमान 20 डिग्री सेल्सियस सूं नीचे दरज कर्यो गयो है। सब सूं कम 11 दशमलव 2 डिग्री सेल्सियस तापमान माउंट आबू मांय दर्ज करीज्यो। उदयपुर, जालौर अर सीकर मांय रात रो तापमान 15 डिग्री रियो। वठी ने राजधानी जयपुर मांय भी पारो लुढ़कर 19 डिग्री सेल्सियस माथे आ ग्यो। आगले तीन दिनां ताँई प्रदेश मांय घण्खर ठोड़ां माथे मौसम सूखो रेहवण री आस है। काले बीकानेर संभाग मांय सुंवारे रे बगत कठी-कठी घणो कोहरो छायो रह सके हैं।

000

प्रदेश मांय न्यारा—न्यारा हादसा मांय 6 जणा री मौत व्हेग्यी अर 22 जणा घायल व्हेग्या। जैसलमेर जिला रा रामगढ खेतर मांय काल देर रात गाय ने बचावण रे चालतां एक जीप बेकाबू होर पलट ग्यी। इण हादसा मांय एक ही पिरवार रा दो लोगां री मौत व्हेग्यी अर सात जणा घायल व्हे ग्या। वठी ने ब्यावर जिला रा बादनवाडा टोल रे कने देर रात बस पलटणे सूं एक मोट्यार री मौत व्हेग्यी अर 15 जणा घायल व्हे ग्या।

वठी ने सवाईमाधोपुर जिले रे मलारना ढूंगर खेतर मांय बनास नदी मांय मछली पकडणे खातिर ग्या दो जणा री ढूबणे सूं मौत व्हेग्यी। मरण वाळा आपस मांय चाचा—भतीजा हा। चित्तौडगढ जिला रा गंगरार खेतर मांय कुए मांय ढूबणे सूं एक जणा री मौत व्हेग्यी। ओ युवक मेवाड यूनिवर्सिटी रो छात्र हो।

000

पीएम सूर्य घर मुफ्त बिजली योजना मांय पंजीकरण खातिर जैसलमेर मांय आज डिस्कॉम री कानी सूं शिविर लगायो गयो। शिविर मांय आवण वाळा पात्र लोगां रो मौके माथे ई पंजीकरण कर्यो गयो। इण रे चालता लोगां ने योजना सूं मिलण वाळा न्यारा न्यारा फायदा री जाणकारी भी दी गई।

00000

प्रधानमंत्री नरेन्द्र मोदी 24 नवम्बर दीतवार ने आकाशवाणी ऊं प्रसारित कर्या जावण वाळा खास कार्यक्रम 'मन की बात' मांय विचार बतावेला। आ हर महीना प्रसारित कर्या जावण वाळा ई रेडियो कार्यक्रम री 116वीं कड़ी व्हेला। आप ई महीना री 22 तारीख ताँई मुफ्त नम्बर 1 8 0 0 – 1 1 – 7 8 0 0 डायल कर र सुझाव दे सको हो। ई रे अलावा 1922 नम्बर माथे मिस्ड कॉल दे र एस एस रे जरिये मिल्या लिंक ऊं ई सुझाव दिया जा सके हैं। ई सागे ई नरेन्द्र मोदी एप या माई जीओवी ओपन फोरम रे जरिये ई ऑनलाइन तरीका ऊं सुझाव दिया जा सके हैं।

000